

Áskorun til Vegagerðarinnar og bæjaryfirvalda í Ísafjarðarbæ.

Við undirrituð, íbúar á Suðureyri og við Súgandafjörð, skorum á Vegagerðina og Ísafjarðarbæ að bæta umferðaröryggi á Suðureyri. Íbúar hafa ítrekað komið á framfæri áhyggjum sínum af sívaxandi hættu meðal annars vegna hraðaksturs, þungaflutninga og aukinnar umferðar ferðamanna.

Hraðaksturinn á sér stað frá bæjarmörkum austan megin og að Sumarróló. Þar eru engar hraðaminnkandi aðgerðir, fyrir utan blikkskilti, sem kom á síðasta ári eftir ítrekaða fundi og óskir um úrbætur. Upplifun íbúa er sú að blikkskiltið hafi lítil sem engin áhrif þar sem hraðaksturinn hefur síst minnkað.

Íbúar leggja til að hraðahindranir verði settar við innkomuna í bæinn sem og við biðskyldumerki er stendur fyrir framan Túngötu 6. Það skal tekið fram að grunnskóli bæjarins er við þennan veg og engar merkingar eða viðvaranir eru þess efnis til að hvetja ökumenn að fara með sérstakri aðgát. Gangstéttar eru af skornum skammti á þessu svæði og víðast hvar engar, svo gangandi vegfarendur nota akveginn. Það skal einnig tekið fram að oftast nær eru börn á leið til og frá skóla á og við veginn.

Við viljum ekki þurfa að koma saman á sorgardegi eftir að keyrt hefur verið á barn sökum þess að ekkert hefur verið að gert.